

摘藻堂四庫全書薈要

史部

欽定四庫全書蒼要卷八千四百六十三

史部

吳越春秋卷四

漢 趙曄 撰

越王無余外傳第六

越之前君無余者

無余禹之六世孫少康之庶子也初受封於越越舊經善無餘

夏禹

之末封也禹父鯀者帝顓頊之後

帝王世紀曰鯀帝顓頊之子字熙連山易

曰鯀封於崇故國語謂之崇伯鯀史記曰鯀之父帝顓

頊世本亦以鯀為顓頊子漢律歷志則曰顓頊五世而

生鯀遠望外紀從之古史曰太史公以鯀為顓頊之子

其世太遠班固以為五世孫近得之比書以為顓頊之

後曰後者可以  
通于無言之也  
絲娶於有莘氏之女名曰女嬀年壯未

孳嬉於砥山得薏苡而吞之意若為人所感因而姓孳

剖脅而產高密

世本曰絲娶有莘氏女謂之女志是生  
高密宋志曰高密為所封國世紀曰絲

妻修己元統生賈昂夢接意感又吞神珠意苡而生為  
名文命字高密史記以文命為禹之名北安國謂禹為名

張晏謂禹為

家于西羌地曰石紐石紐在蜀西川也

茂在

州石泉縣其地有禹廟郡人相傳禹以六月六日生元  
和郡縣志禹法山廣柔人生於石紐村水經注縣有石  
紐鄉禹所生也廣  
柔即今石泉軍  
帝堯之時遭洪水滔滔天下沉漬九

州淵塞因潰壅閉帝乃憂中國之不康悼黎元之罹咎

乃命四嶽乃舉賢良將任治水自中國至于條方莫薦

人帝靡所任四嶽乃舉鯀而薦之於堯帝曰鯀負命毀

族不可尚書堯典作方命圮族史記堯本紀作負命毀族正義曰負音佩違也鯀性狠戾違負教命毀

敗善類不可用也四嶽曰等之羣臣未有如鯀者堯用治水受

命九載功不成帝怒曰朕知不能也乃更求之得舜使

攝行天子之政巡狩觀鯀之治水無有形狀乃殛鯀于

羽山地志在東海郡祝其縣南今海州朐山縣鯀投于水化為黃能或作熊因

為羽淵之神左傳昭公七年晉侯有疾夢黃熊入于寢門子產曰昔堯殛鯀於羽山其神化為黃

熊以入于羽淵杜預解熊音雄獸名亦作能如字一音奴來切三足鼈也按說文及字林皆云能熊屬足似鹿然則能既熊屬又為鼈類作能者勝也東海人祭禹廟不用熊白及鼈為膳豈鯨化為二物乎

舜與四嶽舉鯨之子高密四嶽謂禹曰舜以治水無功舉爾嗣

考之勲禹曰俞小子敢悉考績以統天意惟委

委字下當有任

字而已禹傷父功不成循江沂河盡濟甄

甄字不通疑豎字之誤

淮乃勞身焦思以行七年聞樂不聽過門不入冠挂不

顧履遺不躡功未及成愁然沉思乃案黃帝中經歷蓋

聖人所記曰在于九山東南天柱號曰宛委

在會稽縣東南十五

里一名  
玉筍山

赤帝在闕其巖之巔承以文玉覆以盤石其書

金簡青玉為字編以白銀皆琢其文禹乃東巡登衡嶽

血白馬以祭不幸所求禹乃登山仰天而嘯因夢見赤

繡衣男子自稱玄夷蒼水使者聞帝使文命于斯故來

候之非厥歲月將告以期無為戲吟故倚歌覆釜之山

輿地志會稽山有石狀如覆釜謂之覆釜山一名釜山  
繡亦作釜史黃帝本紀曰合符釜山索隱以為合諸侯  
符契圭璋而朝之於釜山在媯州  
懷戎縣北三里非此之釜山也

東顧謂禹曰欲得我

山神書者齋於黃帝巖嶽之下三月庚子登山發石金

簡之書存矣禹退又齋三月庚子登宛委山發金簡之

書案金簡玉字得通水之理

徐天祐曰禹未嘗兩至越其至越在會計之時非治

水時也禹貢記南方山川多與今不合禹治水時未嘗親至南方故也孟子曰禹八年于外而禹貢云作十有三載乃同或者以為比禹治水之年通鯨九載言之也馬融曰禹治水三年而八州平是十二年而八州平十三年而兗州平兗州平在舜受終之年然則禹之成功不過三四年間耳此書謂勞身焦思七年功未及成乃東巡登宛委發金簡之書得通水之理使禹之治水七年而後得神書始知通水之理不已晚乎諸若此類益傳疑尚矣復返歸嶽乘四載

陸行乘車水行乘船泥行乘橈山行乘樺橈音莖樺丘遙切

以行川始於霍山

南嶽衡山又名霍山泰與岱衡與霍皆一山二名

徂集五嶽

詩云信彼南山惟禹甸之遂巡行四瀆與益夔共謀行  
到名山大澤召其神而問之山川脈理金玉所有鳥獸  
昆蟲之類及八方之民俗殊國異域土地里數使益疏  
而記之故名之曰山海經禹三十未娶行到塗山會稽志塗

山在山陰縣西北四十五里蘇鶚演義塗山有四一會稽  
稽二渝州巴縣舊江州三濠州四當塗縣按左氏昭公  
四年傳穆有塗山之會哀公七年傳禹合諸侯于塗山  
杜預解並云在壽春東北說者曰今濠州也柳宗元塗  
山銘序曰周穆遐遺法復會于是山然則禹與穆王  
皆嘗會諸侯於塗山矣然非必皆壽春也若禹之所娶  
則未詳何地水經註江州縣水北岸有塗山南有夏禹  
廟塗君祠廟銘存焉常璩庾仲雍並言禹娶於此越絕

等書乃云禹娶于會稽塗山應劭曰在永興北永興今蕭山縣也又與郡志所載不同蓋會稽實禹會侯計功之地非所娶之國下文兼載

白狐九尾之異尤為可疑

恐時之暮失其度制乃辭

云吾娶也必有應矣乃有白狐九尾造於禹禹曰白者吾之服也其九尾者王之證也塗山之歌曰綏綏白狐九尾疵疵我家嘉夷來賓為王成家成室我造彼昌天人之際於茲則行明矣哉禹因娶塗山謂之女嬌取辛壬癸甲

呂氏春秋曰禹娶塗山氏女不以私害公自辛至甲四日復往治水

禹行十月女

嬌生子啟啟生不見父晝夕呱呱啼泣禹行使太章步

東西豎亥度南北

淮南子禹使太章步自東極至于西垂豎亥步自南極盡於北垂許慎曰

太章豎亥善行人皆禹臣

暢八極之廣旋天地之數禹濟江南省水

理黃龍負舟舟中人怖駭禹乃啞

烏格切笑聲易震卦笑言啞啞音同然

而笑曰我受命於天竭力以勞萬民生性也死命也爾

何為者顏色不變謂舟人曰此天所以為我用龍曳尾

舍舟而去南到計於蒼梧

禮弓舜葬於蒼梧之野史記舜死於蒼梧之野葬於九疑

今九疑山在道州寧遠縣南六十里亦名蒼梧山

而見縛人禹拊其背而哭蓋

曰斯人犯法自合如此哭之何也禹曰天下有道民不

惟辜天下無道罪及善人吾閩一男不耕有受其饑一  
女不桑有受其寒吾為帝統治水土調民安居使得其  
所今乃罹法如斯此吾德薄不能化民證也故哭之悲

耳於是周行寓內東造絕迹西延積石

地志在金城郡河關縣西南今

鄆州龍支縣

南踰赤岍

水經新安縣南白石山名廣陽山水曰赤岍水

北過寒谷

劉向

別錄燕有黍谷地美而寒不生五穀鄆子居之吹律而溫氣至左思越寒谷豐黍吹律以暖之

徇崑崙

崑崙說曰崑崙之山三級下曰樊桐一名板松中曰玄圃一名閼風上曰層城一名天庭地理志在臨羗西即

河源所出察六扈脈地里名金石寫流沙於西隅

地理志流沙在居延

西北杜佑曰在沙州西八十里其沙隨風流行故曰流沙

**決弱水於北漢**  
地理志弱水在張掖

郡刪丹縣柳宗元曰水散渙無力不能負芥投之則委靡墊沒及底而後止故曰弱

**青泉赤淵分**

入洞穴通江東流至於碣石

地理在北平郡驪成縣西南今平州之南

**疏九**

河於潛淵開五水於東北鑿龍門

地理志在馮翊夏陽縣今河中府龍門縣

**闕伊闕**

在洛陽西南五十里禹疏以道水兩山相對望之若闕伊水歷其間北流故曰伊闕

**平易**

相土觀地分州殊方各進有所納貢民去崎嶇歸於中

國堯曰俞以固冀於此乃號禹曰伯禹官曰司空賜姓

姁氏領統州伯以巡十二部堯崩禹服三年之喪如喪

考妣晝哭夜泣氣不屬聲堯禪位于舜舜薦大禹改官

司徒內輔虞位外行九伯舜崩禪位命禹禹服三年形

體枯槁面目黎黑讓位商均退處陽山之南

史記註劉熙曰今潁

川陽城是也

陰阿之北萬民不附商均追就禹之所狀若驚

鳥揚天駭魚入淵晝歌夜吟登高號呼曰禹棄我如何  
所戴禹三年服畢哀民不得已即天子之位三載考功

五年政定周行天下歸還大越登茅山

史記註禹到大越上苗山十道

志會稽山本名茅山一名苗山

以朝四方羣臣觀示中州諸侯防風後

至斬以示衆示天下悉屬禹也乃大會計治國之道內

美釜山州慎

慎當作鎮

之功外演聖德以應天心遂更名茅

山曰會稽之山因傳國政休養萬民國號曰夏后封有

功爵有德惡無細而不誅功無微而不賞天下喁喁若

兒思母子歸父而留越恐羣臣不從言曰吾聞食其實

者不傷其枝飲其水者不濁其流吾獲覆釜之書得以

除天下之災令民歸於里閭其德彰彰若斯豈可忘乎

乃納言聽諫安民治室居靡山伐木為邑畫作印橫木

為門調權衡平斗斛造井示民以為法度鳳凰棲於樹  
鸞鳥巢於側麒麟步於庭百鳥佃於澤遂已者艾將老  
歎曰吾晏歲年暮壽將盡矣止絕斯矣命羣臣曰吾百  
世之後葬我會稽之山葦椁桐棺

墨子曰禹葬會稽衣  
裘三領桐棺三寸

穿壙七尺下無及泉墳高三尺土階三等葬之後曰無  
改畝以為居之者樂為之者苦禹崩之後眾瑞竝去天  
美禹德而勞其功使百鳥還為民田大小有差進退有  
行一盛一衰往來有常禹崩傳位與益益服三年思禹

未嘗不言喪畢益避禹之子啟於箕山之陽

史記註劉  
熙曰高高

之諸侯去益而朝啟曰吾君帝禹子也啟遂即天子之

位治國於夏遵禹貢之美悉九州之土以種五穀累歲  
不絕啟使使以歲時春秋而祭禹以越立宗廟於南山  
之上禹以下六世而得帝少康少康恐禹祭之絕祀乃  
封其庶子於越號曰無余余始受封人民山居雖有鳥  
田之利

地理志山上有禹井禹祠相傳下有羣鳥耘  
田也水經註鳥為之耘春拔草根秋啄其穢租

貢纔給宗廟祭祀之費乃復隨陵陸而耕種或逐禽鹿

而給食無余質朴不設宮室之飾從民所居春秋祠禹

墓於會稽

皇覽曰禹冢在會稽山上

無余傳世十餘末君微劣不能

自立轉從衆庶為編戶之民禹祀斷絕十有餘歲有人

生而言語其語曰鳥禽呼嚙喋嚙喋指天向禹墓曰我

是無余君之苗末我方修前君祭祀復我禹墓之祀為

民請福於天以通鬼神之道衆民悅喜皆助奉禹祭四

時致貢因共封立以承越君之後復夏王之祭安集鳥

田之瑞以為百姓請命自後稍有君臣之義號曰無壬

壬生無暉暉專心守國不失上天之命無暉卒或為夫

譚夫譚生元常

元常作允

常立當吳王壽夢諸樊闔閭之時

越之興霸自元常矣

越世家二十餘世至於允常高氏越史曰夏自少康至桀中十二世

按少康元年壬午至周敬王元年壬午凡一千五百六十一  
年吳之伐越見春秋昭公三十二年敬王十年也至是二千五百七十年矣越之傳國至於元常何止二十餘世耶

### 勾踐入臣外傳第七

越王勾踐五年五月與大夫種范蠡

呂氏春秋高誘解范蠡楚三戶人也

字少伯大夫種姓文氏字會楚之郢人按郢本都子之國比云楚之郢人蓋郢為楚所并爾又太史公素王妙

論曰范蠡本南陽人列仙傳云徐人索隱曰大夫官種  
名也一云大夫姓種司馬司空之比今按大夫官命如  
以為姓也則大夫遂同大  
夫卑如等宜皆共姓而

入臣於吳羣臣皆送至浙江

之上臨水祖道

祖道行也

軍陣固陵

范蠡教兵城也水經註  
行江又逕固陵城北昔

范蠡築城於浙江之濱言可以固守  
謂之固陵今之西陵也即今西興渡

大夫文種前為祝

其詞曰皇天祐助前沉後揚禍為德根憂為福當威人

者滅服從者昌王雖牽致其後無殃君臣生離感動上

皇眾夫哀悲莫不感傷臣請薦脯行酒三觴越王仰天

太息舉杯垂涕默無所言種復前祝曰大王德壽無疆

無極乾坤受靈神祇輔翼我王厚之祉祐在側德銷百  
殃利受其福去彼吳庭來歸越國觴酒既升請稱萬歲  
越王曰孤承前王餘德守國於邊幸蒙諸大夫之謀遂  
保前王丘墓今遭辱耻為天下笑將孤之罪耶諸大夫  
之責也吾不知其咎願二三子論其意大夫扶同

史記作逢

同曰何言之鄙也昔湯繫於夏臺

史夏紀桀曰吾悔不遂殺湯於夏臺索隱

夏臺獄名夏曰均臺皇甫謐云地在陽翟

伊尹不離其側文王囚於石室

地理

志河內湯陰有羸里城西伯所拘處此云石室疑即所囚之室也羸音西

太公不棄其國興

衰在天存亡繫於人湯改儀而媚於桀文王服從而幸於紂夏殷恃力而虐二聖兩君屈已以得天道故湯王不以窮自傷周文不以困為病越王曰昔堯任舜禹而天下治雖有洪水之害不為人災變異不及於民豈況於人君乎大夫苦成曰不如君王之言天有歷數德有薄厚黃帝不讓堯傳天子三王臣弒其君五霸子弒其父德有廣狹氣有高下今之世猶人之市置貨以設詐抱謀以待敵不幸陷厄求伸而已大王不覽於斯而懷

喜怒越王曰任人者不辱身自用者危其國大夫皆前  
圖未然之端傾敵破讎坐招泰山之福今寡人守窮若  
斯而云湯文困厄後必霸何言之違禮儀夫君子爭寸  
陰而棄珠玉今寡人冀得免於軍旅之憂而復返係獲  
獲當作於敵人之手身為傭隸妻為僕妾往而不返客死敵  
國若鬼魄有此下當愧於前君其無知體骨棄捐何大  
夫之言不合於寡人之意於是大夫種范蠡曰聞古人  
曰居不幽志不度形不愁思不遠聖王賢主皆遇困厄

之難蒙不赦之耻身拘而名尊軀辱而聲榮處卑而不

以為惡居危而不以為薄五帝德厚而而當窮厄之恨

然尚有泛濫之憂此下疑三守暴困之辱不離三獄之

困泣涕而受冤行哭而為隸演易作卦司馬遷書西伯

天道祐之時過於期否終則泰諸侯竝救王命見符朱

鬣玄狐太公六韜曰商王拘周伯昌於羸里太公與散

得犬戎氏文馬豪毛朱鬣目如黃金名鷄斯之乘又淮

南子曰散宜生以千金得騶虞之乘玄玉百穀大貝百

朋玄豹黃熊青犴白虎文皮千合獻紂以輔臣結髮折

免西伯羸里之囚此云玄狐當作玄豹

獄破械反國修德遂討其讎擢假海內若覆手背天下  
宗之功垂萬世大王屈厄臣誠盡謀夫截骨之劍無削  
剗之利白鐵之矛無分髮之便建策之士無暴興之說  
今臣遂天文案隆籍二氣共崩存亡互處彼興則我辱  
我霸則彼亡二國爭道未知所就大王之危天道之數  
何必自傷哉夫吉者凶之門福者禍之根今大王雖在

危困之際孰知其非暢達之兆哉大夫計硯

越絕硯作  
倪史貨殖

傳越王勾踐困於會稽之上乃用范蠡計然註徐廣曰  
計然者范蠡之師也名研故諺曰研桑心筭裴駢案范

子曰計然者葵丘濮上人姓辛氏字文子其先晉國亡公子也南游於越范蠡師事之蔡謨曰蠡所著書名計然蓋非也漢書古今人表計然列在第四倪與研聲相近而相亂耳曰今君王國於會稽

窮於入吳言悲辭苦羣臣泣之雖則恨悵之心莫不感動而君王何為謾辭譁說用而相欺臣誠不取越王曰

寡人將去入吳以國累諸臣大夫願各自述吾將屬焉

大夫臯如曰臣聞大夫種忠而善慮民親其知士樂為

用今委明一人其道必守何順心佛命羣臣佛符勿切大也詩佛

時仔肩音弼註亦作大言一人足矣何必從心所欲大命羣臣也大夫曳庸左傳作后庸國語作

庸舌曰大夫文種者國之梁棟君之爪牙夫驥不可與匹

馳日月不可並照君王委國於種則萬網千紀無不舉者越王曰夫國者前王之國孤力弱勢劣不能遵守社稷奉承宗廟吾聞父死子代君亡臣親今事棄諸大夫客官於吳委國歸民以付二三子吾之由也亦子之憂也君臣同道父子共氣天性自然豈得以在者盡忠亡者為不信乎何諸大夫論事一合一離令孤懷心不定也夫推國任賢度功績成者君之命也奉教順理不失

分

去聲

者臣之職也吾願諸大夫以其所能而云委質而

已於乎悲哉計硯曰吾王所陳者固其理也昔湯入夏

付國於文祀西伯之殷委國於一老今懷憂將滯志在

於還夫適市之妻教嗣冀除出亡之君勅臣守禦子周

以事臣謀以能今君王欲士之所志各陳其情舉其能

者議其宜也越王曰大夫之論是也吾將逝矣願

願下當有

聞諸君之風大夫種曰夫內修封疆之後外修耕戰之

備荒無遺土百姓親附臣之事也大夫范蠡曰輔危主

存亡國不耻屈厄之難安守被辱之地往而必反與君  
復讎者臣之事也大夫苦成曰發君之令明君之德窮  
與俱厄進與俱霸統煩理亂使民知分去聲臣之事也大  
夫曳庸曰奉令受使結和諸侯通命達旨賂往遺來解  
憂釋患使無所疑出不忘命入不被尤臣之事也大夫  
皓進曰一心齊志上與等之下不違令動從君命修德  
履義守信溫故臨非決疑君誤臣諫直心不撓舉過列  
平不阿親戚不私於外推身致君終始一分臣之事也

大夫諸稽郢曰望敵設陣飛矢揚兵履腹涉屍血流滂  
滂貪進不退二師相當破敵攻衆威凌百邦臣之事也  
大夫臯如曰修德行惠撫慰百姓身臨憂勞動輒躬親  
弔死存疾救活民命蓄陳儲新食不二味國富民實為  
君養器臣之事也大夫計碗曰候天察地紀歷陰陽觀  
變參災分別妖祥日月含色五精錯行福見知吉妖出  
知凶臣之事也越王曰孤雖入於北國為吳窮虜有諸  
大夫懷德抱術各守一分以保社稷孤何憂焉遂別於

浙江之上羣臣垂泣莫不咸哀越王仰天嘆曰死者人  
之所畏若孤之聞死其於心胸中曾無怵惕遂登船徑  
去終不返顧越王夫人乃據船哭顧烏鵲啄江渚之蝦  
飛去復來因哭而歌之曰仰飛鳥兮烏鳶凌玄虛號

號當

作翩翩集洲渚兮優恣啄蝦矯翮兮雲間任厥

此闕一字

兮

往還妾無罪兮負地有何辜兮譴天颯颯

凡梵兩音馬疾步

獨

兮西往孰知返兮何年心悒悒

憂也詩憂心悒悒

兮若割淚泣

泣

胡犬切淚流貌

兮雙懸又哀吟曰彼飛鳥兮鳶鳥已迴翔兮

翕蘇心在專兮素蝦何居食兮江湖徊復翔兮游颺去

復返兮於乎始事君兮去家終我命兮君都終來遇兮

何幸幸當  
作辜離我國兮去吳妻衣褐兮為婢夫去冕兮為

奴歲遙遙兮難極冤悲痛兮心惻腸千結兮服膺於乎

哀兮忘食願我身兮如鳥身翱翔兮矯翼去我國兮心

搖情憤惋兮誰識越王聞夫人怨歌心中內慟乃曰孤

何憂吾之六翮備矣於是入吳見夫差稽首再拜稱臣

曰東海賤臣勾踐上愧皇天下負后土不裁功力污辱

王之軍士抵罪邊境大王赦其深辜裁加役臣使執箕

箒誠蒙厚恩得保須臾之命不勝仰感俯愧臣勾踐叩

頭頓首吳王夫差曰寡人於子亦過矣子不念先君之

讎乎越王曰臣死則死矣惟大王原之伍胥在旁目若

燦火聲如雷霆乃進曰夫飛鳥在青雲之上尚欲繳音

生絲縷也微矢以射之豈況近卧於華池集於庭廡乎今越

王放於南山之中游於不可存之地幸來涉我壤土入

吾柱廂此乃厨宰之成事食也豈可失之乎吳王曰吾

聞誅降殺服禍及三世吾非愛越而不殺也畏皇天之  
咎教而赦之太宰嚭諫曰子胥明於一時之計不通安  
國之道願大王遂其所執無拘羣小之口夫差遂不誅  
越王令駕車養馬秘於宮室之中三月吳王召越王入  
見越王伏於前范蠡立於後吳王謂范蠡曰寡人聞貞  
婦不嫁破亡之家仁賢不官絕滅之國今越王無道國  
已將亡社稷壞崩身死世絕為天下笑而子及主俱為  
奴僕來歸於吳豈不鄙乎吾欲赦子之罪子能改心自

新棄越歸吳乎范蠡對曰臣聞亡國之臣不敢語政敗  
軍之將不敢語勇臣在越不忠不信今越王不奉大王  
命號用兵與大王相持至今獲罪君臣俱降蒙大王鴻  
恩得君臣相保願得入備掃除出給趨走臣之願也此  
時越王伏地流涕自謂遂失范蠡矣吳王知范蠡不可  
得為臣謂曰子既不移其志吾復置子於石室之中范  
蠡曰臣請如命吳王起入宮中越王范蠡趨入石室越  
王服犢鼻着樵頭夫人衣無緣之裳施左闕之櫛夫斫

劉養馬妻給水除糞灑掃三年不愠怒面無恨色吳王  
登遠高望見越王及夫人范蠡坐於馬糞之旁君臣之  
禮存夫婦之儀具王顧謂太宰嚭曰彼越王者一節之  
人范蠡一介之士雖在窮厄之地不失君臣之禮寡人  
傷之太宰嚭曰願大王以聖人之心哀窮孤之士吳王  
曰為子赦之後三月乃擇吉日而欲赦之召太宰嚭謀  
曰越之與吳同土連域勾踐愚黠親欲為賊寡人承天  
之神靈前王之遺德誅討越寇囚之石室寡人心不忍

見而欲赦之於子奈何太宰嚭曰臣聞無德不復大王

垂仁恩加越越豈敢不報哉願大王卒意

終其意也

越王聞

之召范蠡告之曰孤聞於外心獨喜之又恐其不足也

范蠡曰大王安心事將有意在玉門第一今年十二月

戊寅之日時加日出戊囚日也寅陰後之辰也合庚辰

歲後會也夫以戊寅日聞喜不以其罪罰日也時加卯

而賊戊功曹為騰蛇而臨戊謀利事在青龍青龍在勝

光而臨酉死氣也而尅寅是時尅其日用又助之所求

之事上下有憂此豈非天網四張萬物盡傷者乎王何喜焉果子胥諫吳王曰昔桀囚湯而不誅紂囚文王而不殺天道還反禍轉成福故夏為湯所誅殷為周所滅今大王既囚越君而不行誅臣謂大王惑之深也得無夏殷之患乎吳王遂召越王久之不見范蠡文種憂而占之曰吳王見擒也有頃太宰嚭出見大夫種范蠡而言越王復拘於石室伍子胥復諫吳王曰臣聞王者攻敵國克之則加以誅故後無報復之憂遂免子孫之患

今越王已入石室宜早圖之後必為吳之患太宰嚭曰

昔者齊桓割燕所至之地以貺燕公

齊桓公救燕北伐山戎而還燕君送

桓公出境桓公因

而齊君獲其美名宋襄濟河而戰

宋襄

割燕所至地于燕

公與楚成王戰于泓目夷曰及其未濟擊之公不聽已濟陣成宋人擊之宋師大敗公曰君子不困人於阨不

鼓不成列春秋以多其義功立而名稱軍敗而德存今大王

誠赦越王則功冠於五霸名越於前古吳王曰待吾疾

愈方為太宰赦之後一月越王出

出當作坐

石室召范蠡曰

吳王疾三月不愈吾聞人臣之道主疾臣憂且吳王遇

孤恩甚厚矣疾之無瘳惟公卜焉范蠡曰吳王不死明  
矣到己巳日當瘳惟大王留意越王曰孤所以窮而不  
死者賴公之策耳中復猶豫豈孤之志哉可與不可惟  
公圖之范蠡曰臣竊見吳王真非人也數

色角切

言成湯

之義而不行之願大王請求問疾得見因求其糞而嘗  
之觀其顏色當拜賀焉言其不死以瘳起日期之既言  
信後則大王何憂越王明日謂太宰嚭曰囚臣欲一見  
問疾太宰嚭即入言於吳王王召而見之適遇吳王之

便

平聲下同

太宰嚭奉溲惡以出

溲所尤切惡過各切下同溲即便也惡大溲也大小

溲亦曰前後溲

逢戶中越王因拜請嘗大王之溲以決

見史倉公傳

吉凶即以手取其便與惡而嘗之因入曰下囚臣勾踐

賀於大王王之疾至己巳日有瘳至三月壬申病愈吳

王曰何以知之越王曰下臣嘗事師聞糞者順穀味逆

時氣者死順時氣者生今者臣竊嘗大王之糞其惡味

苦且楚酸是味也應春夏之氣臣以是知之吳王大悅

曰仁人也乃赦越王得離其石室去就其宮室執牧養

之事如故越王從嘗糞惡之後遂病口臭范蠡乃令左

右皆食岑草以亂其氣

會稽賦註岑草葢也菜名擷之小有臭氣凶年民斲其根食之

會稽志葢山在府西北六里越王嘗採葢于此

其後吳王如越王期日疾愈心

念其忠臨政之後大縱酒於文臺吳王出令曰今日為

越王陳北面之坐羣臣以客禮事之伍子胥趨出到舍

上不御坐酒酣太宰嚭曰異乎今日坐者各有其詞不

仁者逃其仁者留臣聞同聲相和同心相求今國相剛

勇之人意者內慙至仁之存也而不御坐其亦是乎吳

王曰然於是范蠡與越王俱起為吳王壽其辭曰下臣  
勾踐從小臣范蠡奉觴上千歲之壽辭曰皇在上令昭  
下四時并心察慈仁者大王躬親鴻恩立義行仁九德  
四塞咸服羣臣於乎休哉傳德無極上感太陽降瑞翼  
翼大王延壽萬歲長保吳國四海咸承諸侯賓服觴酒  
既升永受萬福於是吳王大悅明日伍子胥入諫曰昨  
日大王何見乎臣聞內懷虎狼之心外執美詞之說但  
為外情以存其身財不可謂廉狼不可謂親今大王好聽

須臾之說不慮萬歲之患故棄忠直之言聽用讒夫之語不滅瀝血之仇不絕懷毒之怨猶縱毛爐炭之上幸

其

其當  
作不

焦投卵千鈞之下望必全豈不殆哉臣聞桀登

高自知危然不知所以自安也前據白刃自知死而不知所以自存也惑者知返迷道不遠願大王察之吳王曰寡人有疾三月曾不聞相國一言是相國之不慈也又不進口之所嗜心不相思是相國之不仁也夫為人臣不仁不慈焉

於度  
何也

能知其忠信者乎越王迷惑棄

守邊之事親將其臣民來歸寡人是其義也躬親為虜  
妻親為妾不愠寡人寡人有疾親嘗寡人之漵是其慈  
也虛其府庫盡其實幣不念舊故是其忠信也三者既  
立以養寡人寡人曾聽相國而誅之是寡人之不智也  
而為相國快其意耶豈不負皇天乎子胥曰何大王之  
言反也夫虎之卑勢將以有擊也狸之卑身將求所取  
也雉以眩移拘於網魚以有悅死於餌且大王初臨政  
負玉門之第九誠事之敗無咎矣今年三月甲戌時加

鷄鳴甲戌歲位之會將也青龍在酉德在土刑在金は日賊其德也知父將有不順之子君有逆節之臣大王以越王歸吳為義以飲溲食惡為慈以虛府庫為仁是故為無愛於人其不可親面聽貌觀以存其身今越王入臣於吳是其謀深也虛其府庫不見恨色是欺我王也下飲王之溲者是上食王之心也下嘗王之惡者是上食王之肝也大哉越王之崇吳吳將為所擒也惟大王留意察之臣不敢逃死以負前王一旦社稷丘墟宗

廟荆棘其悔可追乎吳王曰相國置之勿復言矣寡人  
不忍復聞於是遂赦越王歸國送於蛇門之外羣臣祖  
道吳王曰寡人赦君使其返國必念終始王其勉之越  
王稽首曰今大王哀臣孤窮使得生全還國與種蠡之  
徒願死於轂下上天蒼蒼臣不敢負吳王曰於乎吾聞  
君子一言不再今已行矣王勉之越王再拜跪伏吳王  
乃引越王登車范蠡執御遂去至三津之上仰天歎曰  
嗟乎孤之屯厄誰念復生渡此津也謂范蠡曰今三月

甲辰時加日昃

徒結切日昃也梁元帝纂要日在未曰昃

孤蒙上天之命還

歸故鄉得無後患乎范蠡曰大王勿疑直抵道行越將

有福吳當有憂至浙江之上望見大越山川重秀天地

有清王與夫人歎曰吾已絕望永辭萬民豈料再還重

國言竟掩面涕泣闌干

文選註闌干多貌

此時萬姓咸歡

羣臣畢賀

吳越春秋卷四



總校官進士臣胡 榮

校對官中書臣朱 鈐

騰錄監生臣曹錫爵

欽定四庫全書薈要

史部

吳越春秋卷五

六

詳校官員外郎臣楊世綸



欽定四庫全書薈要卷八千四百六十四

史部

吳越春秋卷五

漢 趙曄 撰

勾踐歸國外傳第八

越王勾踐臣吳至歸越勾踐七年也

臣語勾踐與范蠡入臣於吳三年而

吳人遣之當魯哀公五年是為勾踐七年正與此合此書於勾踐五年書入吳事至是歸國首尾三年也

姓拜之於道曰君王獨無苦矣今王受天之福復於越國霸王之迹自斯而起王曰寡人不慎天教無德於民

今勞萬姓擁於岐路將何德化以報國人顧謂范蠡曰

今十有二月己巳之日時加禺中

禺音隅禺中時加己也淮南曰臻于衡陽

是謂禺中對于昆吾是謂正中

孤欲以此到國何如蠡曰大王且留以

臣卜日於是范蠡進曰異哉大王之擇日也王當疾

趨車馳人走越王策馬飛輿遂復宮闕吳封地百里於

越東至炭瀆

越舊經炭瀆在會稽縣東六十里越絕曰勾踐稱炭聚載從炭瀆至鍊塘會稽志作

炭瀆西止周宗南造於山北薄於海越王謂范蠡曰孤獲

辱連年勢足以死得相國之策再返南鄉今欲定國立

城人民不足其功不可以興為之奈何范蠡對曰唐虞

卜地夏殷封國古公營城周雒威折萬里德致八極豈

直欲破彊敵收鄰國乎越王曰孤不能承前君之制修

德自守亡衆棲於會稽之山請命乞恩受辱被耻囚結

吳宮幸來歸國追以百里之封將遵前君之意復以會

稽之上而宜釋吳之地范蠡曰昔公劉去邠而德彰於

夏夏父讓地而名發於岐今大王欲

欲字下當有立字

國樹都

并敵國之境不處平易

以豉切

之都據四達之地將焉

於處

切立霸王之業越王曰寡人之計未有決定欲築城立

郭分設里閭欲委屬於相國於是范蠡乃觀天文擬法

於紫宮築作小城周千一百二十一步一圓三方西北

立龍飛翼之樓以象天門東南伏漏石竇以象地戶陵

門四達以象八風外郭築城而缺西北示服事吳也不

敢壅塞內以取吳故缺西北而吳不知也北向稱臣委

命吳國左右易處

易音亦處上聲

不得其位明臣屬也城既成

而怪山自生者琅琊東武海中山也一夕自來故名怪

山 即龜山也在府東南二里一名飛來一名寶林一名怪山越絕曰龜山勾踐所起游臺也寰宇記龜山即

琅琊東武山 范蠡曰臣之築城也其應天矣崑崙之象一夕移于此

存焉越王曰寡人聞崑崙之山乃地之林上承皇天氣

吐宇內下處后土稟受無外滋聖生神嘔養帝會故

上當有五字 帝處其陽陸二王居其正地吾之國也扁扁疑當作

偏 天地之壤乘東南之維斗去極北非糞土之城何能

與王者比隆盛哉范蠡曰君徒見外未見於內臣乃承

天門制城合氣於后土獄象已設崑崙故出越之霸也

越王曰苟如相國之言孤之命也范蠡曰天地卒號以

著其實名東武起游臺其上東南為司馬門立增樓增與

層冠其山巔以為靈臺水經註怪山者越起靈臺於山上又作三層樓以望雲物起

離宮於淮陽越絕曰離臺周五百六十步在淮陽里丘越舊經淮陽宮在會稽縣東南二里中

宿臺在於高平越絕宿作指云中指臺馬丘周六百步在高平里越舊經中宿在會稽縣東七

里越絕駕臺在於成丘馳於離丘立苑於樂野越絕曰越王

樂故謂樂野其山上石室越王所休謀也十道志樂野勾踐以此野為苑今有樂瀆村燕臺在於

石室越舊經宴臺在齋臺在於襟山按越境無襟山越州東南十里絕曰稷山者勾踐

齋戒臺也既曰齋臺則襟當作  
稷稷山在會稽縣東五十三里勾踐之出游也休息食

室於冰厨

一曰冰室所以備膳羞也

越王乃召相國范蠡大夫種大

夫郢問曰孤欲以今日上明堂臨國政專恩致令以撫

百姓何日可矣惟三聖

謂聖臣也指上三人而言子胥曰越有聖臣范蠡

紀綱

維持范蠡曰今日丙午日也丙陽將也是日吉矣又因

良時臣愚以為可無始有終得天下之中大夫種曰前

車已覆後車必戒願王深察范蠡曰夫子故不一二見

也吾王今以丙午復初臨政解救其本是一宜夫金制

始而火救其終是二宜蓄金之憂轉而及水是三宜君

臣有差不失其理是四宜王相去聲俱起天下立矣是五

宜臣願急升明堂臨政越王是日立政翼翼小心出不

敢奢入不敢侈越王念復吳讎非一旦也苦身勞心夜

以接日目卧則攻之以蓼足寒則漬之以水冬常抱冰

夏還握火愁心苦志懸膽於戶出入嘗之不絕於口中

夜潛泣泣而復嘯越王曰吳王好服之離體吾欲采葛

詩毛氏箋葛所以為締絡使女工織細布獻之以求吳王之心於子

何如羣臣曰善乃使國中男女入山采葛

會稽縣東十里有葛山越

絕曰勾踐種葛使越女治葛布獻吳王

以作黃絲之布欲獻之未及遣使

吳王聞越王盡心自守食不重味衣不重綵雖有五臺

之游未嘗一日登翫吾欲因而賜之以書增之以封東

至於勾甬西至於檣李南至於姑末

即春秋越姑蔑之地姑蔑地名有二

魯國下縣南有姑蔑城越之姑蔑至秦屬會稽為太末縣今衢州

北至於平原

越絕作武原今

海鹽縣

縱橫八百餘里越王乃使大夫種索葛布十萬甘

蜜丸党

韻會引吳越春秋越以甘蜜丸投報吳增封之禮謂檣為越椒今此書無丸檣二字詳下

文文筭之類皆以數計則甘蜜當作九寔玉篇寔丁益切寔也此寔字誤

文筭七枚狐皮五

雙晉竹十度

度當作搜漢溝洫志漕船五百搜今文作艘音騷船總名也或作艘

以復封

禮吳王得之曰以越僻狄

狄當作狹

之國無珍今舉其貢貨

而以復禮此越小心念功不忘吳之效也夫越本興國

千里吾雖封之未盡其國子胥聞之退卧於舍謂侍者

曰吾君失其石室之囚縱於南林之中今但因虎豹之

野而與荒外之草於吾之心其無損也吳王得葛布之

獻乃復增越之封賜羽毛之飾机杖諸侯之服越國大

悅采葛之婦傷越王用心之苦乃作苦之詩

事類賦引  
吳越春秋

曰乃作若何之歌會稽賦註  
亦引此書曰乃作何苦之詩

曰葛不連蔓爇台台

音  
貽我

君心苦命更之嘗膽不苦甘如飴

事類賦及越舊經  
所引皆作未若飴

令

我采葛以作絲

文選註引采葛婦詩有饑不遑食  
四體疲一句此書無之闕文也

女工

織兮不敢遲弱於羅兮輕霏霏號絺素兮將獻之越王

悅兮忘罪除吳王歡兮飛尺書增封益地賜羽竒机杖

茵褥諸侯儀羣臣拜舞天顏舒我王何憂能不移於是

越王內修其德外布其道君不名教臣不名謀民不名

使官不名事國中蕩蕩無有政令越王內實府庫墾其

田疇民富國彊衆安道秦越王遂師八臣與其四友時

問政焉大夫種曰愛民而已越王曰奈何種曰刑之無

害成之無敗生之無殺與之無奪越王曰願聞種曰無

奪民所好則利也民不失其時則成之省刑去罰則生

之薄其賦斂則與之無多臺游則樂之靜而無苛則喜

之民失所好則害之農失其耕則敗之有罪不赦則殺

之重賦厚斂則奪之多作臺游以罷音疲民則苦之勞擾

民力則怒之

詳文意上文與之無奪以下當有樂之無苦喜之無怒二句

臣聞善為

國者遇民如父母之愛其子如兄之愛其弟聞有饑寒為之哀見其勞苦為之悲越王乃緩刑薄罰省其賦斂於是人民殷富皆有帶甲之勇九年正月越王召五大夫而告之曰昔者越國遁棄宗廟身為窮虜耻聞天下辱流諸侯今寡人念吳猶躡者不忘走盲者不忘視孤未知策謀惟大夫誨之扶同曰昔之亡國流民天下莫不聞知今欲有計不宜前露其辭臣聞擊鳥之動故前

俯伏

此上八字文衍

猛獸將擊必餌

餌當作弭

毛帖伏鷲鳥將搏必

卑飛戢翼聖人將動必順辭和衆聖人之謀不可見其

象不可知其情臨事而伐故前無剽過之兵後無伏襲之患今大王臨敵破吳宜損之辭無令泄也臣聞吳王兵彊於齊晉而怨結於楚大王宜親於齊深結於晉陰固於楚而厚事於吳夫吳之志猛驕而自矜必輕諸侯而凌鄰國三國決權還為敵國必角勢交爭越承其弊因而伐之可克也雖五帝之兵無以過此范蠡曰臣聞

謀國破敵動觀其符孟津之會諸侯曰可武王辭之方  
今吳楚結讎構怨不解齊雖不親外為其救晉雖不附  
猶效其義夫內臣謀而決讎其策鄰國通而不絕其援  
斯正吳之興霸諸侯之上尊臣聞峻高者隕

亦作頽  
下墜也茂

葉者摧日中則移月滿則虧四時不並盛五行不俱馳

陰陽更唱

唱當  
作倡

氣有盛衰故溢堤之水不淹其量燿乾

之火不復其熾水靜則無漚瀾之怒火消則無熹毛之  
熱今吳乘諸侯之威以號令於天下不知德薄而恩淺

道狹而怨廣權懸而智衰力竭而威折兵挫而軍退士  
散而衆解臣請按師整兵待其壞敗隨而襲之兵不血  
刃士不旋踵吳之君臣為虜矣臣願大王匿聲無見其  
動以觀其靜大夫昔成曰夫水能浮草木亦能沉之地  
能生萬物亦能殺之江海能下谿谷亦能朝之聖人能  
從衆亦能使之今吳承闔閭之軍制子胥之典教政平  
未虧戰勝未敗大夫嚆者狂佞之人達於策慮輕於朝  
事子胥力於戰伐死於諫議二人權必有壞敗願王虛

心自匿無示謀計則吳可滅矣大夫浩曰今吳君驕臣奢民飽軍勇外有侵境之敵內有爭臣之震其可攻也

大夫句如

左傳國語皆作舉如

曰天有四時人有五勝

五德迭相勝也史歷

書秦滅六國頗據五勝而自以為獲水德之瑞前漢律歷志同

昔湯武乘四時之利而

制夏殷桓繆據五勝之便而列六國此乘其時而勝者也王曰未有四時之利五勝之便願各就職也

勾踐陰謀外傳第九

越王勾踐十年二月越王深念遠思侵辱於吳蒙天祉

福得

得下當  
有返字

越國羣臣教誨各畫一策辭合意同勾踐

敬從其國已富反越五年未聞敢死之友或謂諸大夫  
愛其身惜其軀者乃登漸臺望觀其羣臣有憂與否相  
國范蠡大夫種句如之屬儼然列坐雖懷憂患不形顏  
色越王即鳴鐘驚檄驚疑當  
作警而召羣臣與之盟曰寡人  
獲辱受耻上愧周王下慙晉楚幸蒙諸大夫之策得返  
國修政富民養士而五年未聞敢死之士雪仇之臣奈  
何而有功乎羣臣默然莫對者越王仰天歎曰孤聞主

憂臣辱主辱臣死今孤親被奴虜之厄受囚破之耻不能自輔須賢任仁然後討吳重負諸臣大夫何易見而難使也於是計硯年少官卑列坐於後乃舉手而趨蹈席而前進曰謬哉君王之言也非大夫易見而難使君王之不能使也越王曰何謂計硯曰夫官位財幣金賞者君之所輕也操鋒履刃音刈命投死者士之所重也今王易易字不通疑去字之誤去各同財之所輕而責士之所重何其殆哉於是越王默然不悅面有愧色即辭羣臣進計硯

而問曰孤之所得士心者何等計硯對曰夫君人尊其仁義者治之門也士民者君之根也開門固根莫如正身正身之道謹左右左右者君之所以盛衰者也願王明選左右得賢而已昔太公九聲而足

其義未詳或恐字誤

磻溪

之餓人也西伯任之而王管仲魯之亡囚有貪分之毀

管仲曰吾始困時嘗與鮑叔賈分財利多自與鮑叔不以我為貪知我貧也

齊桓得之而霸

故傳曰失士者亡得士者昌願王審於左右何患羣臣之不使也越王曰吾使賢任能各殊其事孤虛心高望

冀聞報復之謀今咸匿聲隱形不聞其語厥咎安在計

硯曰選賢實士各有一等遠使以難平聲試以效其誠

內告以匿以知其信與之論事以觀其智飲之以酒以

視其亂

酒能亂性論語唯酒無量不及亂

指之以使

曲禮者指使註指事使人也

以

察其能示之以色以別其態五色以設士盡其實人竭

其智知其智盡實則君臣何憂越王曰吾以謀士效實

人盡其智而士有未盡進辭有益寡人也計硯曰范蠡

明而知內文種遠以見外願王請大夫種與深議則霸

王之術在矣越王乃請大夫種而問曰吾昔日受夫子之言自免於窮厄之地今欲奉不羈之計以雪吾之宿讎何行而功乎大夫種曰臣聞高飛之鳥死於美食深泉之魚死於芳餌今欲伐吳必前求其所好參其所願然後能得其實越王曰人之所好雖其願何以定而制之死乎大夫種曰夫欲報怨復讎破吳滅敵者有九術

史記作  
七術

君王察焉越王曰寡人被辱懷憂內慙朝臣外

愧諸侯中心迷感精神空虛雖有九術安能知之大夫

種曰夫九術者湯文得之以王桓穆得之以霸其攻城

取邑易於脫屣願大王覽之種曰一日尊天事鬼

鬼下當有

神字下文亦兼鬼神言之

以求其福二曰重財幣以遺

去聲贈也下同

其君

多貨賄以喜其臣三曰貴糴粟稟以虛其國利所欲以

疲其民四曰遺美女以惑其心而亂其謀五曰遺之巧

工良材使之起宮室以盡其財六曰遺之諛臣使之易

伐七曰彊其諫臣使之自殺八曰君王國富而備利器

九曰利甲兵以承其弊凡此九術君王閉口無傳守之

以神取天下不難而况於吳乎越王曰善乃行第一術

立東郊以祭陽名曰東皇公立西郊以祭陰名曰西王

母祭陵山於會稽

陵山禹陵之山先秦古書帝王家皆不稱陵之名自漢始

祀水

澤於江州

今之江州春秋時為吳西境楚東境起不得祀水澤於其地兼晉以前亦未有江州之名

黃之已郡古有江州縣又去起遼遠亦非當時祀水澤之地州字義當作洲按說文州者也字本作州水中可

居者州今作洲蓋後人加水以別州縣之字

事鬼神一年國不被災越王曰

善哉大夫之術願論其餘種曰吳王好起宮室用工不

輟王選名山神材奉而獻之越王乃使木工千有餘人

入山伐木一年師無所幸作士

工作之士

思歸皆有怨望之

心而歌木客之吟

水經註勾踐使工人伐柴槓欲以獻吳久不得歸工人憂思作木客吟

一夜天生神木一雙大二十圍長五十尋陽為文梓陰

為榱桷巧工施校制以規繩雕治圓轉刻削磨礮分以

丹青錯畫文章嬰以白璧鏤以黃金狀類龍蛇文彩生

光乃使大夫種獻之於吳王曰東海役臣臣孤勾踐使

臣種敢因下吏聞於左右賴大王之力竊為小殿有餘

材謹再拜獻之吳王大悅

徐天祐曰天生神木不假日夜之所息一夕而大二十圍

長五十尋有是哉使茲事而信越嘗以其木致於吳而  
行人之解乃曰東海役臣獻為殿之餘材甚非所以禮  
吳而示有先也且越有五臺未嘗敢上吳王以為畏法  
服威夫既天之產材若是其異人之致飾若是其都而  
名之曰餘材則越之為殿亦已侈矣而特以  
其遺餘奉吳何越之失言而吳之易悅耶

子胥諫曰

王勿受也昔者桀起靈臺紂起鹿臺陰陽不和寒暑不  
時五穀不熟天與其災民虛國變遂取滅亡大王受之  
必為越王所戮吳王不聽遂受而起姑蘇之臺三年聚

材五年乃成高見二百里

臺始基於閻闕而新作於夫  
差吳地記曰高三百丈廣八

十四 行路之人道死巷哭不絕嗟嘻之聲民疲士苦人

不聊生越王曰善哉第二術也

十一年越王深念永思惟欲伐吳乃請計硯問曰吾欲  
伐吳恐不能破早欲興師惟問於子計硯對曰夫興師  
舉兵必且內蓄五穀實其金銀滿其府庫厲其甲兵凡

此四者必察天地之氣原於陰陽明於孤虛

史龜策傳  
日辰不全

故有孤虛六甲孤虛法甲子旬中無戌亥戌即為孤  
辰已即為虛益旬空為孤對衝為虛餘五旬可以類推  
劉歆七畧有風  
后孤虛二十卷審於存亡乃可量敵越王曰天地存亡

其要奈何計硯曰天地之氣物有死生原陰陽者物貴

賤也明孤虛者知會際也審存亡者別真偽也越王曰  
何謂死生真偽乎計硯曰春種八穀夏長而養秋成而  
聚冬畜而藏夫天時有生

以四時言則有生當作春生

而不救種是

一死也夏長無苗二死也秋成無聚三死也冬藏無畜  
四死也雖有堯舜之德無如之何夫天時有生勸者老  
作者少反氣應數不失厥理一生也留意省察謹除苗  
穢穢除苗盛二生也前時設備物至則收國無逋稅民  
無失穗三生也倉已封塗除陳入新君樂臣勸男女及

信四生也夫陰陽者太陰所居之歲留息三年貴賤見

矣夫孤虛者謂天門地戶也存亡者君之道德也越王

曰何子之年少於物之長也計碗曰有美之士不拘長

少越王曰善哉子之道也乃仰觀天文集察緯宿

天象定者

為經動者為緯故五星亦曰五緯宿音秀列星也歷象四時以下者上虛設八

倉從陰收著

涉畧切置也

望陽出糶策

策通作策

其極計三年五

倍越國熾富勾踐歎曰吾之霸矣善計碗之謀也十二

年越王謂大夫種曰孤聞吳王淫而好色惑亂沉湎不

領政事因此而謀可乎種曰可破夫吳王淫而好色宰  
嚭佞以曳心往獻美女其必受之惟王選擇美女二人  
而進之越王曰善乃使相者國中得苧蘿山鬻薪之女

曰西施鄭旦

會稽志苧蘿山在諸暨縣南五里輿地志諸暨縣苧羅山西施鄭旦所居十道志勾

踐索美女以獻吳王得之諸暨苧蘿山賣薪女也西施山下有浣沙石

飾以羅縠教以容

步習於土城

越舊經土城在會稽東六里

臨於都巷三年學服而獻

於吳乃使相國范蠡進曰越王勾踐竊有二遺女越國  
澆下困迫不敢稽留謹使臣蠡獻之大王不以鄙陋寢

容

貌不揚曰寢通作寢廣韻寢陋又貌醜或作侵史魏其傳武安貌侵短小謂醜惡也

願納以供

箕箒之用吳王大悅曰越貢二女乃勾踐之盡忠於吳之證也子胥諫曰不可王勿受也臣聞五色令人目盲五音令人耳聾昔桀易湯而滅紂易文王而亡大王受之後必有殃臣聞越王朝書不倦晦誦竟夜且聚敢死之士數萬是不死必得其願越王服誠行仁聽諫進賢是不死必成其名越王夏被毛裘冬御絺綌是人不死必為對隙臣聞賢士國之寶美女國之咎夏亡以

妹喜殷亡以妲己周亡以褒姒桀伐有施有施氏以妹喜女焉有寵而亡夏紂

伐有蘇有蘇氏以妲己女焉有寵而亡殷幽王伐有褒

有褒人以褒姒女焉有寵生伯服遂太子宜臼太子奔

申中人與緇戾戎攻幽王周

於是乎亡妹音末喜音嬉 吳王不聽遂受其女越王

曰善哉第三術也

十三年越王謂大夫種曰孤蒙子之術所圖者吉未嘗

有不合也今欲復謀吳奈何種曰君王自陳越國微鄙

年穀不登願王請糴以入其意天若棄吳必許王矣越

乃使上大夫種使去吳因宰嚭求見吳王辭曰越國漥

乃使上大夫種使去

去

吳因宰嚭求見吳王辭曰越國漥

下水旱不調年穀不登人民飢乏道存饑餒願從大王  
請糴來歲即復太倉惟大王救其窮窘吳王曰越王信  
誠守道不懷二心今窮歸愬吾豈愛惜財寶奪其所願  
子胥諫曰不可非吳有越越必有吳古往則凶來是養  
生寇而破國家者也與之不為親不與未成寃且越有  
聖臣范蠡勇以善謀將有修飾攻戰以伺吾間

去聲  
下同觀

越王之使使來請糴者非國貧民困而請糴也以入吾  
國伺吾王間也吳王曰寡人早服越王而有其衆懷其

社稷以愧勾踐勾踐氣服為駕車却行馬前諸侯莫不  
聞知今吾使之歸國奉其宗廟復其社稷豈敢有反吾  
之心乎子胥曰臣聞士窮非難抑心下人其後有激人  
之色臣聞越王饑餓民之困窮可因而破也今不用天  
之道順地之理而反輸之食固君之命狐雉之相戲也  
夫狐卑體而雉信之故狐得其志而雉必死可不慎哉  
吳王曰勾踐國憂而寡人給之以粟恩往義來其德昭  
昭亦何憂乎子胥曰臣聞狼子有野心仇讎之人不可

親夫虎不可餒以食蝮

蝮名一曰虺善螫人

蛇不恣其意今大王

捐國家之福以饒無益之讎棄忠臣之言而順敵人之

欲臣必見越之破吳豸

豸無足曰豸疑當作豸

鹿游於姑胥之臺

荆榛蔓於宮闕願王覽武王伐紂之事也太宰嚭從旁

對曰武王非紂王臣也率諸侯以伐其君雖勝殷謂義

乎子胥曰武王即成其名矣太宰嚭曰親戮王以為名

吾不忍也子胥曰盜國者封侯盜金者誅今使武王失

其理則周何為三家之表

意謂釋箕子之囚封比干之墓表商容之間也

太宰

嚳曰子胥為人臣徒欲干君之好拂君之心以自稱

去聲

滿君何不知過乎子胥曰太宰嚳固欲以求其親前縱

石室之囚受其實女之遺

去聲

外交敵國內惑於君大王

察之無為羣小所侮今大王譬若浴嬰兒雖啼無聽宰

嚳之言吳王曰宰嚳是子無乃聞寡人言非忠臣之道

類於佞諛之人太宰嚳曰臣聞鄰國有急千里馳救是

乃王者封亡國之後五霸輔絕滅之末者也吳王乃與

越粟萬石而令之曰寡人逆羣臣之議而輸於越年豐

而歸寡人大夫種曰臣奉使返越歲登誠還吳貸大夫  
種歸越越國羣臣皆稱萬歲即以粟賞賜羣臣及於萬  
民二年越王粟稔揀擇精粟而蒸還於吳復還斗斛之  
數亦使大夫種歸之吳王王得越粟長太息謂太宰嚭  
曰越地肥沃其種甚嘉可留使吾民植之於是吳種越  
粟粟種殺而無生者吳民大饑越王曰彼以窮居其可  
攻也大夫種曰未可國始貧耳忠臣尚在天氣未見須  
俟其時越王又問相國范蠡曰孤有報復之謀水戰則

乘舟陸行則乘輿與舟之利頓於兵弩今子為寡人謀事莫不謬者乎范蠡對曰臣聞古之聖君莫不習戰用

兵然行陣隊伍軍鼓之事吉凶決在其工今聞越有處

女出於南林

越舊經南林在山陰縣南

國人稱善願王請之立可見

越王乃使使聘之問以劍戟之術處女將北見於王道

逢一翁自稱曰袁公問於處女吾聞子善劍願一見之

女曰妾不敢有所隱惟公試之於是袁公即杖箠箠竹

箠箠竹名箠直尋切箠夾魚

切吳都賦其竹則篔簹箠箠竹枝上頡橋未墮地女即

捷末

藝文類聚引吳越春秋處女善劍事與此小異曰袁公即挽林內之竹似枯槁末折墮地女接取其

末按此書末字當作末捷通作接易晝日三接禮記太子生接以太牢左傳子同生接以太牢註並音捷

袁

公則飛上樹變為白猿遂別去見越王越王問曰夫劍

之道則如之何女曰妾生深林之中長於無人之野無

道不習不達諸侯竊好擊之道誦之不休妾非受於人

也而忽自有之越王曰其道如何女曰其道甚微而易

其意甚幽而深道有門戶亦有陰陽開門閉戶陰衰陽

興凡手戰之道內實精神外示安儀見之似好婦奪之

似懼虎布形候氣與神俱往杳之若日偏如滕

滕當  
作騰兔

追形逐影光若佛彷彿呼吸往來不及法禁縱橫逆順直

復不聞斯道者一人當百百人當萬王欲試之其驗即

見越王即加女號號曰越女乃命五板之墮長高習之

教軍士

詩註一大為版五板為堵左傳五版為堵五堵為雉版亦作板此墮字疑當作隊長疑是上聲

高或人名也

當世

勝字上校當有莫能二字

勝越女之劍於是范蠡復進

善射者陳音音楚人也越王請音而問曰孤聞子善射

道何所生音曰臣楚之郢人嘗步於射術未能悉知其

道越王曰然願子一二其辭音曰臣聞弩生於弓弓生於彈彈起古之孝子越王曰孝子彈者奈何音曰古者人民朴質饑食鳥獸渴飲霧露死則裹以白茅投於中野孝子不忍見父母為禽獸所食故作彈以守之絕鳥獸之害故歌曰斷竹續竹飛土逐肉之謂也於是神農皇帝

皇當作黃

弦木為弧剡木為矢

世本黃帝臣牟夷作矢

弧矢之利

以威四方黃帝之後楚有弧父弧父者生於楚之荆山生不見父母為兒之時習用弓矢所射無脫以其道傳

於羿羿傳逢蒙逢蒙傳於楚琴氏琴氏以為弓矢不足

以威天下當是之時諸侯相伐兵刃交錯弓矢之威不

能制服琴氏乃橫弓着臂施機設樞

釋名弩柄曰臂鈞  
弦曰牙牙外曰部

郭下有懸刀合而名之曰機言機巧也亦言如門戶之樞機開闔有節

加之以力然後諸

侯可服琴氏傳之楚三侯

文選註所引與此畧同但云琴氏傳大魏大魏傳楚三侯

少異耳

所謂句亶鄂章人號麋侯翼侯魏侯也

熊渠三子長子康為

句亶王紅為鄂王少子執疵為越章王三侯者未僭王號時所稱也

自楚之三侯傳至靈

王自稱之楚累世蓋以桃弓棘矢而備鄰國也

楚右尹子革曰

唯是桃弧棘矢  
以共禦王事

自靈王之後射道分流百家能用莫

得其正臣前人受之於楚五世於臣矣臣雖不明其道  
惟王試之越王曰弩之狀何法焉陳音曰郭為方城守  
臣子也教為人君命所起也牙為執法守吏卒也牛為  
中將主內裏也闕為守禦檢去止也錡為侍從聽人主  
也臂為道路通所使也弓為將軍主重負也弦為軍師  
禦戰士也矢為飛客主教使也金為實敵往不止也衛  
為副使正道理也又為受教知可否也縹為都尉執左

右也敵為百死不得駭也鳥不及飛獸不暇走弩之所  
向無不死也臣之愚劣道悉如此越王曰願聞正射之  
道音曰臣聞正射之道道衆而微古之聖人射弩未發  
而前名其所中

射命中也

臣未能如古之聖人請悉其要夫

射之道身若戴板頭若激卵左蹉右足橫

句

左手若附

枝右手若抱兒舉弩望敵翕心咽煙與氣俱發得其和

平神定思去去止分離右手發機左手不知一身異教

豈况雄雌此正射持弩之道也願聞望敵儀表投分

平聲

飛矢之道音曰夫射之道從分望敵合以參連

周禮五射二曰

參連前放一矢後

三矢連續而去也弩有斗石矢有輕重石取一兩其數

乃平遠近高下求之銖分道兮在斯無有遺言越王曰

善盡子之道願子悉以教吾國人音曰道出於天事在

於人人之所習無有不神於是乃使陳音教之習射於

北郊之外三月軍士皆能用弓弩之巧陳音死越王傷

之葬於國西號其葬所曰陳音山

在山陰縣西南四里寰宇記曰屬上虞縣

也非

吳越春秋卷五

欽定四庫全書薈要卷八千四百六十五

史部

吳越春秋卷六

漢 趙曄 撰

勾踐伐吳外傳第十

勾踐十五年謀伐吳

按勾踐七年歸自吳既反國四年即與范蠡謀伐吳自茲四年間必

謀之蠡皆以為未可國語記之稍詳至是始伐吳左傳見於哀公十三年正勾踐十五年也

謂大夫

種曰孤用夫子之策免於天虐之誅還歸於國吾誠已

記音稅

於國人國人喜悅而子昔日云有天氣即來陳

之今豈有應乎種曰吳之所以彊者為有子胥今伍子  
胥忠諫而死是天氣前見亡國之證也願君悉心盡意  
以說國人越王曰聽孤說國人之辭寡人不知其力之  
不足以大國報讎以暴露百姓之骨於中原此則寡人  
之罪也寡人誠更其術於是乃葬死問傷弔有憂賀有  
喜送往迎來除民所害然後卑事夫差往宦士三百人  
於吳吳封孤數百里之地因約吳國父兄昆弟而誓之  
曰寡人聞古之賢君四方之民歸之若水寡人不能為

政將率二三子夫婦以為藩輔令壯者無娶老妻老者

無娶壯婦女子十七未嫁其父母有罪丈夫二十不娶

免者免身脫也謂生子

以告於孤令醫守之

生男二貺之以壺酒一犬生女二賜以壺酒一豚

犬陽畜豚

陰畜生子三人孤與乳母生子二人孤與一養長子死三

年釋吾政季子死三月釋吾政必哭泣葬埋之如吾子

也令孤子寡婦疾疹貧病者納官其子欲仕量

平其居

好上聲其衣飽其食而簡銳之凡四方之士來者必朝而

禮之載飯與羹以游國中國中童子戲而遇孤孤鋪而  
啜之施以愛問其名非孤飯不食非夫人事不衣七年  
不收國民家有三年之盲男即歌樂女即會笑今國之  
父兄日請於孤曰昔夫羞辱吾君王於諸侯長為天下  
所耻今越國富饒君王節儉請可報耻孤辭之曰昔者  
我辱也非二三子之罪也如寡人者何敢勞吾國之人  
以塞吾之宿讎父兄又復請曰誠四封之內盡吾君子  
子報父仇臣復君隙豈敢有不盡力者乎臣請復戰以

除君王之宿讎孤悅而許之大夫種曰臣觀吳王得志於齊晉謂當遂涉吾地以兵臨境今疲師休卒一年而不試以忘於我我不可怠臣當卜之於天吳民既疲於軍困於戰鬪市無赤米之積國廩空虛其民必有移徙之心寒就蒲羸

羸當作羸蒲水草羸蚌蛤之屬

於東海之濱夫占兆

人事又見於卜筮王若起師以可會之利犯吳之邊鄙未可往也吳王雖無伐我之心亦難動之以怒不如誑其間

去聲

以知其意越王曰孤不欲有征伐之心國人請

戰者三年矣吾不得不從民人之欲今聞大夫種諫難

去聲越父兄又諫曰吳可伐勝則滅其國不勝則困其兵

吳國有成王與之盟功名聞於諸侯王曰善於是乃大

會卒臣而令之曰有敢諫伐吳者罪不赦蠡種相謂曰

吾諫已不合矣然猶聽君王之令越王會軍列士而大

誡衆而誓之曰寡人聞古之賢君不患其衆不足而患

其志行去聲之少耻也國語註少耻謂進不念功臨難苟免今夫差衣水犀

甲者十有三萬人徽外有山犀有水犀水犀之皮有珠甲山犀則無吳以水犀皮飾甲也周

禮屏甲  
壽百年

不患其志行之少耻也而患其衆之不足今寡

人將助天威吾不欲匹夫之小勇也吾欲士卒進則思

賞退則避刑於是越民父勉其子兄勸其弟曰吳可伐

也越王復召范蠡謂曰吳已殺子胥道

道當作導

諛者衆吾

國之民又勸孤伐吳其可伐乎范蠡曰未可須明年之

春然後可耳王曰何也范蠡曰臣觀吳王北會諸侯於

黃池精兵從王國中空虛老弱在後太子留守兵始出

境未遠聞越掩其空虛兵還不難也不如來春其夏六

月丙子勾踐復問范蠡曰可伐矣乃發習流二千人俊

士四萬君子六千諸御千人

史記俊士作教士索隱曰虞書云流宥五刑習流謂

流放之罪人使之習戰教士謂常所教練之兵也君子謂君所子養有恩惠者諸御謂諸理事之官在軍有職掌者徐天祐曰笠澤之戰越以三軍潛涉蓋以兵師勝此所謂習流是即習水戰之兵若曰使罪人習戰越一小國流放者何至二千人哉以乙酉與吳戰丙戌遂虜殺太子丁亥

入吳焚姑胥臺吳生口急於夫差夫差方會諸侯於黃池恐天下聞之即密不令洩已盟黃池乃使人請成於越勾踐自度未能滅乃與吳平

二十一年七月越王復悉國中士卒伐吳

按左傳哀公十七年越伐

吳吳禦之笠澤實勾踐十九年事此書不當以為二十一年也

會楚使申包胥聘於越

越王乃見包胥曰吳可伐耶申包胥曰臣鄙於策謀未

足以卜越王曰吳為不道殘我社稷夷吾宗廟以為平

原使不得血食吾欲與之徼天之中

國語作衷

惟是輿馬兵

革卒伍既具無以行之誠聞

開當作問

於戰何以為可申包

胥曰臣愚不能知越王固問包胥乃曰夫吳良國也傳

賢於諸侯敢問君王之所戰者何越王曰在孤之側者

飲酒食肉未嘗不分孤之飲食不致其味聽樂不盡其

聲求以報吳願以此戰包胥曰善則善矣未可以戰越

王曰越國之中吾博愛以子之忠惠以養之吾今修寬

刑欲

國語欲  
作施

民所欲去民所惡

烏故切  
憎也

稱其善掩其惡

道各切  
不善也

求以報吳願以此戰包胥曰善則善矣未可以

戰王曰越國之中富者吾安之貧者吾予之救其不足

損其有餘使貧富不失其利求以報吳願以此戰包胥

曰善則善矣未可以戰王曰邦國南則距楚西則薄晉

北則望齊春秋奉幣玉帛子女以貢獻焉未嘗敢絕求

以報吳願以此戰包胥曰善哉無以加斯矣猶未可戰

夫戰之道知音智為之始以仁次之以勇斷之君將去聲不

知即無權變之謀以別衆寡之數不仁則不得與三軍

同饑寒之節齊苦樂之喜不勇則不能斷去就之疑決

可否之議於是越王曰敬從命矣冬十月越王乃請八

大夫國語越王乃召五大夫問戰奚以而可韋昭解五大夫舌庸苦成大夫種范蠡畢如之屬按此書其

辭大畧與國語同而云八大夫則異詳下文  
止七人豈與楚大夫申包胥共為八大夫耶曰昔吳為

不道殘我宗廟夷我社稷以為平原使不血食吾欲徼

天之中

衷

兵革既具無所以行之吾聞於申包胥即已

命孤矣敢告諸大夫如何大夫曳庸曰審賞則可戰也

審其賞明其信無功不及有功必加則士卒不怠王曰

聖哉大夫苦成曰審罰則可戰審罰則士卒望而畏之

不敢違命王曰勇哉大夫文種曰審物則可戰審物則

別是非是非明察人莫能惑王曰辨哉大夫范蠡曰審

備則可戰審備慎守以待不虞備設守固必可應難

去聲

王曰慎哉大夫臯如曰審聲則可戰審於聲音以別清濁清濁者謂吾國君名聞於周室令諸侯不怨於外王曰得哉大夫扶同曰廣恩之分則可戰廣恩以博施知分而不外王曰神哉大夫計碗曰候天察地參應其變則可戰天變地應人道便利三者前見則可王曰明哉於是勾踐乃退齋而命國人曰吾將有不虞之議自近及遠無不聞者乃復命有司與國人曰承命有賞皆造國門之期有不從命者吾將有顯戮勾踐恐民不信使

以征不義聞於周室令

平聲

諸侯不恐於外令

去聲已下  
令字皆同

國中曰五日之內則吾良人矣過五日之外則非吾之

民也又將加之以誅教令既行乃入命於夫人王背

音倍

下背垣同

屏夫人向屏而立王曰自今日之後內政無出外

政無入各守其職以盡其信內中辱者則是子境外干

里辱者則是子

子當作我

也吾見子於是以為明誠矣王出

宮夫人送王不過屏王因反闔其門填之以土夫人去

筭側席而坐安心無容三月不掃王出則復背垣而立

大夫向垣而敬王乃令大夫曰食

音飼

士不均地壤不修

使孤有辱於國是子之罪臨敵不戰軍士不死有辱於

諸侯功隳於天下是孤之責自今以往內政無出外政

無入吾固誠子大夫敬受命矣王乃出大夫送出垣反

闔外宮之門填之以土大夫側席而坐不御五味不答

所勸勾踐有命於夫人大夫曰國有守禦乃坐露壇之

上列鼓而鳴之軍行成陣即斬有罪者三人以徇於軍

令曰不從吾令者如斯矣明日徙軍於郊斬有罪者三

人徇之於軍令曰不從吾令者如斯矣王乃令國中不行者與之訣而告之曰爾安土守職吾方往征討我宗

廟之讎以謝於二三子令

平聲

國人各送其子弟於郊境

之上軍士各與父兄昆弟取訣國人悲哀皆作離別相

去之詞曰蹀蹀摧長慝兮擢戟馭爰

爰音殊兵器詩伯也執爰周禮爰以

積竹八觚長丈二尺建於兵車旅賁以先驅說文積竹謂削去白取其青處合之取其有力釋名爰殊也長一丈二尺無刃有所撞所離不降兮以泄我王氣蘇三軍

控於車上使殊離也

一飛降

去聲

兮所向皆殂一士判死兮而當百夫道祐有

德兮吳卒自屠雪我王宿耻兮威振八都軍伍難更兮

勢如貌羆

羆猛獸陸璣曰似虎或曰似羆羆椿俱切似狸能捕獸祭天陸佃曰虎五指為羆

行

行各努力兮於乎於乎於是觀者莫不悽惻明日復徙軍於境上斬有罪者三人徇之於軍曰有不從令者如

此後三日復徙軍於檇李斬有罪者三人以徇於軍曰

其淫心匿行

匿疑當作意行去聲

不當敵者如斯矣勾踐乃命有

司大徇軍曰其有父母無昆弟者來告我我有大事子

離父母之養親老之愛赴國家之急子在軍冠之中父

母昆弟有在疾病之地吾視之如吾父母昆弟之疾病

也其有死亡者吾葬埋殯送之如吾父母昆弟之有死亡葬埋之矣明日又徇於軍曰士有疾病不能隨軍從

兵者吾予其醫藥給其糜粥與之同食明日又徇於軍

曰筋力不足以勝平甲兵志行不足以聽王命者吾輕

其重和其任明日旋軍於江南更陳嚴法復誅有罪者

五人徇曰吾愛士也雖吾子不能過也即君所  
子養者及其犯

誅自吾子亦不能脫也恐軍士畏法不使自謂未能得

士之死力道見鼃張腹而怒將有戰爭之氣即為之軾

其士卒有問於王曰君何為敬鼃蟲而為之軾勾踐曰

吾思士卒之怒久矣而未有稱去聲吾意者今鼃蟲無知

之物見敵而有怒氣故為之軾於是軍士聞之莫不懷

心樂死人致其命有司將軍大徇軍中日隊各自令其

部部各自令其士歸而不歸處而不處進而不進退而

不退左而不左右而不右不如令者斬於是吳悉兵屯

於江北越軍於江南越王中分其師以為左右軍皆被

兕甲

爾雅兕似牛註一角青色皮堅厚可制鎧鎧即甲也周禮兕甲壽二百年

又令安廣之

人佩石碣之矢張廬生之弩躬率君子之軍六千人以  
為中陣明日將戰於江乃以黃昏令於左軍銜枚溯江  
而上五里以須吳兵復令於右軍銜枚踰江十里復須  
吳兵於夜半使左軍涉江鳴鼓中水以待吳發吳師聞  
之中大駭相謂曰今越軍分為二師將以夾攻我衆亦  
即以夜暗中分其師以圍越越王陰使左右軍與吳望  
戰以大鼓相聞潛伏其私卒六千人銜枚不鼓攻吳吳

師大敗

左傳載笠澤之戰夾水而陳吳之禦越越之敗吳大槩與此畧同

越之左右軍

乃遂伐之大敗之於囿

韋昭曰囿笠澤也史記正義吳地記皆曰笠澤松江之別名

又敗之於郊又敗之於津如是三戰三北徑至吳圍吳

於西城吳王大懼夜遁越王追奔攻吳兵入於江陽松

陵

吳地記在松江松陌流溢至此故名

欲入胥門來至六七里望吳南城

見伍子胥頭巨若車輪目若耀電鬚髮四張射於十里

越軍大懼留兵假道即日夜半暴風疾雨雷奔電激飛

石揚砂疾如弓弩越軍壞敗松陵却退兵士僵斃人衆

分解莫能救止范蠡文種乃稽顙肉袒拜謝子胥願乞  
假道子胥乃與種蠡夢曰吾知越之必入吳矣故求置  
吾頭於南門以觀汝之破吳也惟欲以窮夫差令汝入  
我之國吾心又不忍故為風雨以還汝軍然越之伐吳  
自是天也吾安能止哉越如欲入更從東門我當為汝  
開道貫城以通汝路於是越軍明日更從江出入海陽  
於三道之翟水乃穿東南隅以達越軍遂圍吳守一年

吳師累敗

左傳哀公二十年越圍吳是為勾踐二十二年哀公二十二年越滅吳為勾踐二十四年

蓋首尾三年也國語曰居軍三年吳師自潰越世家亦曰留圍之三年吳師敗與左傳合此書繫其事於二十一年以為圍守一

遂棲吳王於姑胥之山吳使王孫駱

年而滅吳誤也

史記作公孫雄虞翻曰吳大夫國語作王孫雄韋昭曰王孫姓也

肉袒膝行而前請成

於越王曰孤臣夫差敢布腹心異日得罪於會稽夫差

不敢逆命得與君王結成以歸今君王舉兵而誅孤臣

孤臣惟命是聽意者猶以今日之姑胥曩日之會稽也

若徼天之中衷得赦其大辟則吳願長為臣妾勾踐不

忍其言將許之成范蠡曰會稽之事天以越賜吳吳不

取今天以吳賜越越可逆命乎且君王早朝晏罷切齒  
銘骨謀之二十餘年豈不緣一朝之事耶今日得而棄  
之其計可乎天與不取還受其咎君何忘會稽之厄乎  
勾踐曰吾欲聽子言不忍對其使者范蠡遂鳴鼓而進  
兵曰王已屬政於執事使者急去不時得罪吳使涕泣  
而去勾踐憐之使令入謂吳王曰吾置君於甬東給君  
夫婦三百餘家以沒王世可乎吳王辭曰天降禍於吳  
國不在前後正孤之身失滅宗廟社稷者吳之土地民

臣越既有之孤老矣不能臣王遂伏劍自殺

上卷夫差傳亦曰引

劍而伏之死吳世家云自到死越世家止言自殺按左傳吳王曰孤老矣焉能事君乃縊丘明春秋時人所聞當必不謬越絕曰越王與之劍使自圖之吳王乃自勾日而自殺意者勾踐雖與之劍而夫差自以縊死耶

踐已滅吳乃以兵北渡江淮與齊晉諸侯會于徐州

索隱

曰徐音舒徐州齊邑薛縣是也其字從人左氏作舒大事記解題曰徐州即舒州也史記正義曰音舒其字從人

致貢於周周元王使人賜勾踐已受命號去還江南

以淮上地與楚歸吳所侵宋地與魯泗東方百里當是

之時越兵橫行於江淮之上諸侯畢賀

初學記引吳越春秋曰越王平

吳後立雙臺於越此  
書無之亦闕文也

越王還於吳當歸而問於范蠡曰

何子言之其合於天范蠡曰此素女之道一言即合大

王之事王問為

為當  
作焉

實金匱之要在於上下越王曰善

哉吾不稱王其可悉乎蠡曰不可昔吳之稱王僭天子

之號天變於上日為陰蝕今君遂僭號不歸恐天變復

見越王還於吳置酒文臺羣臣為樂

音洛

乃命樂

音岳  
下同

作

伐吳之曲樂師曰臣聞即事作操

去  
聲

功成作樂君王崇

德誨化有道之國誅無義之人復讎還耻威加諸侯受

霸王之功效可象於圖畫德可刻於金石聲可託於弦

管名可留於竹帛臣請引琴而鼓之遂作章暢辭曰屯

乎今欲伐吳可未耶大夫種蠡曰吳殺忠臣伍子胥今

不伐吳人

人當作又

何須大夫種進祝酒其辭曰皇天祐助

我皇受福良臣集謀我王之德宗廟輔政鬼神承翼君

不忘臣臣盡其力上天蒼蒼不可掩塞觴酒二升萬福

無極於是越王默然無言大夫種曰我王賢仁懷道抱

德滅讎破吳不忘返國賞無所恠羣邪杜塞君臣同和

福祐千億觴酒二升萬歲難極臺上羣臣大悅而笑越  
王面無喜色范蠡知勾踐愛壤土不惜羣臣之死以其  
謀成國定必復不須功而返國也故面有憂色而不悅  
也范蠡從吳欲去恐勾踐未返失人臣之義乃從入越  
行謂文種曰子來去矣越王必將誅子種不然言蠡復  
為書遺種曰吾聞天有四時春生冬伐人有盛衰泰終  
必否知進退存亡而不失其正惟賢人乎蠡雖不才明  
知進退高鳥已散良弓將藏狡兔已盡良犬就烹夫越

王為人長頸鳥喙鷹視狼步可以共患難而不可共處  
樂可與履危不可與安子若不去將害於子明矣文種  
不信其言越王陰謀范蠡議欲去微倖三十四年九月  
丁未范蠡辭於王曰臣聞主憂臣勞主辱臣死義一也  
今臣事大王前則無滅未萌之端後則無救已傾之禍  
雖然臣終欲成君霸國故不辭一死一生臣竊自惟乃  
使於吳王之慙辱蠡所以不死者誠恐讒於太宰嚭成  
伍子胥之事故不敢前死且須臾而生夫耻辱之心不

可以大

承上文而言  
則大當作久

流汗之愧不可以忍幸賴宗廟之

神靈大王之威德以敗為成斯湯武克夏商而成王業

者定功雪耻臣所以當席日久臣請從斯辭矣越王惻

然泣下霑衣言曰國之士大夫是子國之人民是子使

孤寄身託號以俟命矣今子云去欲將逝矣是天之棄

越而喪孤也亦無所恃者矣孤竊有言公位乎

位當  
作住分

國共之去乎妻子受戮范蠡曰臣聞君子俟時計不數

音朔謀死不被疑內不自欺臣既逝矣妻子何法乎王其

勉之臣從此辭乃乘扁舟出三江入五湖人莫知其所適范蠡既去越王愀然變色召大夫種曰蠡可追乎種曰不及也王曰奈何種曰蠡去時陰晝六陽晝三日前之神莫能制者玄武天空威行孰敢止者度天關涉天梁後入天一前翳神光言之者死視之者狂臣願大王勿復追也蠡終不還矣越王乃收其妻子封百里之地有敢侵之者上天所殃於是越王乃使良工鑄金象范蠡之形置之坐側朝夕論政自是之後計硯佯狂大夫

曳庸扶同臯如之徒日益踈遠不親於朝大夫種內憂  
不朝人或讒之於王曰文種棄宰相之位而令君王霸  
於諸侯今官不加增位不益封乃懷怨望之心憤發於  
內色變於外故不朝耳異日種諫曰臣所以在在當  
作蚤朝

而晏罷若身疾作者但為吳耳今已滅之王何憂乎越

王默然時魯哀公患三桓欲因諸侯以伐之三桓亦患

哀公之怒以故君臣作難去聲哀公奔陘三桓攻哀公公

奔衛又奔越

哀公二十七年公如公孫有陘氏乃遂如  
越史記曰公如陘氏三桓攻公公奔于衛

遂如越陘楚地也杜預  
曰有陘氏即有山氏

魯國空虛國人悲之來迎哀公

與之俱歸勾踐憂文種之不圖故不為哀公伐三桓也

二十五年丙午平旦越王召相國大夫種而問之吾聞

知人易自知難其知相國何如人也種曰哀哉大王知

臣勇也不知臣仁也知臣忠也不知臣信也臣誠數

音朔

以損聲色滅淫樂竒說怪諭盡言竭忠以犯大王逆心

拂耳必以獲罪臣非敢愛死不言言而後死昔子胥於

吳當夫差之誅也謂臣曰狡兔死良犬烹敵國滅謀臣

亡范蠡亦有斯言何大王問犯玉門之第八臣見王志

也越王默然不應大夫亦罷哺其耳以成人惡大其妻

曰君賤一國之相少王祿乎臨食不亨亨當哺以惡何

句妻子在側匹夫之能自致相國尚何望哉無乃為貪

乎何其志忽忽若斯種曰悲哉子不知也吾王既免於

患難雪耻於吳我悉徙宅自投死亡之地盡九術之謀

於彼為佞在君為忠王不察也乃曰知人易自知難吾

答之又無他語是凶妖之證也吾將復入恐不再還與

子長訣相求於玄冥之下妻曰何以知之種曰吾見王  
時正犯玉門之第八也辰尅其日上賊於下是為亂醜  
必害其良今日尅其辰上賊下止吾命須臾之間耳越  
王復召相國謂曰子有陰謀兵法傾敵取國九術之策  
今用三已破彊吳其六尚在子所願幸以餘術為孤前  
王於地下謀吳之前人於是種仰天歎曰嗟乎吾聞大  
恩不報大功不還其謂斯乎吾悔不隨范蠡之謀乃為  
越王所戮吾不食善言故哺以人惡越王遂賜文種屬

盧

盧當  
作鑿

之劍種得劍又歎曰南陽之宰而為越王之擒

自笑曰後百世之末忠臣必以吾為喻矣遂伏劍而死

徐天祐曰勾踐脫囚虜之辱苦身勞思君臣相與謀報  
吳者二十餘年卒以越霸諸臣雖與有力而種蠡之功  
居多蠡見幾而作可謂明且哲矣種之死也無罪而越  
王誅之也無名其辭乃曰幸以餘術為孤前王於地下  
謀吳之前人是何言歟令死者有知謀之地下何益如  
其無知焉用謀之夫大功不賞而淫刑以報此種所以  
仰天而歎

越王葬種於國之西山

即卧龍山又名種山  
一曰重山太平御覽

曰種山之名因大夫

樓船之卒三千餘人造鼎足之羨

種以語訛成重也  
周禮冢人丘隧註羨道也疏曰天子有隧諸侯已下有  
羨道史衛世家共伯入釐侯羨索隱曰羨音延延墓道

又以戰切始皇紀曰大事畢閉中羨下  
外羨上卷夫差傳羨門當亦與此同義  
或入三峰之下

葬一年伍子胥從海上穿山脅而持種去與之俱浮於

海故前潮水潘候者伍子胥也後重水者大夫種也越

王既已誅忠臣霸於關東從瑯邪起觀去聲臺周七里以

望東海死士八千人戈船三百艘居無幾射求賢士孔

子聞之從弟子奉先王雅琴禮樂奏於越越王乃被唐

夷之甲

上卷王僚傳  
被棠鑊之甲

帶步光之劍杖屈盧之矛

典畧曰  
周有屈

盧之矛說文矛酋矛也建於兵車長二丈周禮酋  
矛長常有四尺蓋十六尺為常益四尺則二丈也  
出死

士以三百人為陣闕下孔子有頃到越王曰唯唯夫子何以教之孔子曰丘能術五帝三王之道故奏雅琴以

獻之大王

徐天祐曰越滅吳之明年大夫種賜劍以死是為勾踐二十五年即魯哀公二十三年也

此書謂已誅忠臣居無幾求賢士孔子聞之奉雅琴禮樂奏於越皆是年事也竊獨以為不然昔者夫子將見趙簡子聞竇鳴犢舜華之死臨河而不濟為其殺賢大夫而諱傷其類也至作為陬操以哀之文種非賢大夫歟使夫子尚在聞種之死愚知其不入越也而况奏雅琴以干時君乎按春秋哀公十六年夏四月書孔丘卒由文種之死上距夫子之卒已八年矣謂夫子以是年入越非也

越王喟然歎曰越性

脆而愚水行山處以船為車以楫為馬往若飄然去則

難從悅兵敢死越之常也夫子何說而欲教之孔子不

答因辭而去越王使人如木客山取元常之喪

木客山去會稽

縣十五里越絕曰木客大家者允常冢也欲徙葬琅邪二穿元常之墓墓中

生熯風

熯火飛貌風熱如火飛也

飛砂石以射人人莫能入

水經註冢中分

風飛沙射人不得近

勾踐曰吾前君其不徙乎遂置而去勾踐乃

使使號令齊楚秦晉皆輔周室血盟而去秦桓公不如

越王之命

按史年表勾踐二十五年是為秦厲共公六年此書為秦桓公不如越王之命非也由勾

踐二十五年上距秦桓公之卒蓋一百有六年矣桓公當作厲共公云

勾踐乃選吳越將

士西渡河以攻秦軍士苦之會秦怖懼逆自引咎越乃  
還軍軍人悅樂遂作河梁之詩曰渡河梁兮渡河梁舉  
兵所伐攻秦王孟冬十月冬雪霜隆寒道路誠難當陣  
兵未濟秦師降諸侯怖懼皆恐惶聲傳海內威遠邦稱  
霸穆桓齊楚莊天下安寧壽考長悲去歸兮河無梁自  
越滅吳中國皆畏之

二十六年越王以邾子無道而執以歸立其太子何冬  
魯哀公以三桓之逼來奔越王欲為伐三桓以諸侯大

夫不用命故不果耳

二十七年冬勾踐寢疾將卒

通鑑外紀勾踐三十二年薨

謂太子興

夷曰吾自禹之後承元常之德蒙天靈之祐神祇之福  
從窮越之地籍楚之前鋒以摧吳王之干戈跨江涉淮  
從晉齊之地功德巍巍自致於斯其可不誠乎夫霸者  
之後難以久立其慎之哉遂卒興夷即位一年卒子翁  
翁卒子不揚不揚卒子無疆疆卒子玉玉卒子尊尊卒  
子親自勾踐至于親共歷八主皆稱霸積年二百二十

四年親衆皆失而去琅邪徙於吳矣自黃帝至少康十  
世自禹受禪至少康即位六世為一百四十四年少康  
去顓頊即位四百二十四年

黃帝 昌意 顓頊 鯀 禹 啟 太康

仲康 相 少康 無余 無玉去無余六世

無皞 夫康 元常 勾踐 興夷 不壽 不揚

無彊 魯穆柳有幽公為名 王侯自稱為君

尊親失琅邪為楚所滅勾踐至王親歷八主格

格當  
作稱霸

二百二十四年從無余越國始封至餘善返越國空滅

凡一千九百二十二年

此書載越世次自勾踐五傳至王無彊以世家考之則十世矣

無彊王之侯之子所謂王侯自稱為君或者即王之侯也世家曰王無彊時楚威王興兵大敗越殺無彊盡取越地越以此散徐廣曰周顯王四十六年今自勾踐卒至越亡凡一百五十三年通鑑書之顯王三十五年此云勾踐至於親歷八主稱霸二百二十四年親衆皆失去瑯邪徙於吳為楚所滅與史世家及紀年皆不合若如世家所載則無彊之死衆散久矣非王親時失衆亡國也又記年曰王翳三十三年遷于吳則越之徙吳已又亦非王親時也

大德十年歲在丙午三月刊校

前文林郎國子監書庫官徐天祐音註

紹興路儒學學錄留堅

紹興路儒學學正陳曷伯

紹興路儒學教授梁相

正議大夫紹興路總管提調學校官劉克昌

吳越春秋卷六



總校官庶吉士臣張能照  
校對官編修臣楊壽楠  
謄錄監生臣潘奕基